



JL 6
2529
37



門牌86
號2529
卷49-37

吉林通志卷九十五

人物志二十四 國朝九

達音布 子岱袞

阿濟格尼堪

伊理布

英俄爾岱

薩弼圖

博爾輝 冷僧機

譚拜

瑪爾賽

阿蘭珠 弟布爾堪

永順

西喇布

馬喇希

博爾晉

特錦

從子瑪沁
族子瑚蘭

察瑪海

巴篤哩

卓羅

瑪哈達

蒙阿圖

達音布姓他塔喇氏世居扎庫木天命初來歸

太祖後隸滿洲正白旗於締造諸勳臣比功校績初無以加而殉疆場者三世追昂安戰蒙古厄爾格勒而陳沒者達音布也一等侍衛戰錦州陳沒贈騎都尉世職曰岱袞者其子也都統議政大臣參贊軍務討逆將軍征吳三桂戰永興陳沒曰伊理布諡武壯者其孫也祖父子孫激於

國恩之厚家法之忠迭以死報蓋亦諸勳臣所難哉而念舊人以大酬庸之義盟諸帶礪及乎苗裔抑豈無謂也哉達音布以佐領從

太祖征伐輒爲前鋒多所斬獲積功授騎都尉世職時諸部歸順者爲蒙古所誘復逃去偕副都統楞額禮率兵追至達岱塔擊蒙古兵敗之俘逃人七百有奇六年從

太祖征明奉集堡先驅擒斬偵諜殆盡敵無備猝擊敗其眾累功晉世職輕車都尉先是蒙古扎魯特貝勒昂安執我使臣送葉赫殺之又數遣兵要劫我人民篡奪我牲畜八年

太祖命貝勒阿巴泰等統兵三千討之而達音布爲前鋒統領以精騎五十乘夜渡遼河疾馳踰昂安所屬厄爾格勒百餘里得其巢與參領雅布禪侍衛博爾晉合

兵擣之昂安以二十餘人挽牛車載妻子遁急與雅
希禪等引三十餘騎馳躡之既及昂安直趨達音布
達音布迎搏之不支去引弓抽矢將射之昂安從者
突以槍仰刺達音布格以弓而槍已自口入墮馬創
甚死雅希禪等縱騎擊之斬昂安盡殲其眾師旋

恩卹如故事長子阿哈尼堪

與姓富察氏者同名

襲世職卒無嗣天聰

八年

太宗追錄勳臣

賜敕以次子阿濟格尼堪襲自有傳而第三子岱袞

國家有征伐輒與焉戰比有功崇德七年從攻明經略

洪承疇營卒力戰以殉所謂一等侍衛戰錦州陳沒
贈騎都尉世職者也達音布從子英俄爾岱材兼文
武有雅量析五等爵爲公亦自有傳

阿濟格尼堪襲父達音布輕車都尉世職任參領從

太宗征察哈爾遂由大同入明邊偕護軍統領雅賴擊明兵

於崞縣敗之復偕參領阿爾津覘敵山海關有斬獲

崇德元年從

太宗征朝鮮遇明甯遠守邊兵進戰勝焉三年從貝勒岳託

征明於燕京破總兵侯世祿軍追斬其護印者獲印

與馬四年擢護軍統領從肅親王豪格攻明錦州設

伏於連山獲兵馬十數六年復從鄭親王濟爾哈朗圍錦州以七十人設伏敗敵援兵進攻杏山擁燾躡敵營直入敵眾大潰又攻克錦州外郭擊其松山兵再戰再勝

太宗以阿濟格尼堪年少數破敵

賜銀四百兩晉世職一等俄明經略洪承疇集諸鎮兵援錦州以松杏兩山閒爲運道

太宗統大軍營而截之其總兵吳三桂唐通等潛遁

太宗召授方略與護軍統領鼇拜等追擊大破之八年

命駐防錦州旣偕征明甯遠鄭親王濟爾哈朗攻取中後所

前屯衛阿濟格尼堪率所部及蒙古兵攻中前所總兵黃色遁拔其城又追捕城中逸出者皆獲之論功兼一雲騎尉順治元年從入山海關率護軍破流賊李自成又追敗之望都晉一等男爵旋從豫親王多鐸追剿自成取道河南渡孟津薄潼關賊鑿重濠自衛賊將劉方亮以眾千餘來犯同護軍統領圖賴阿爾津等力戰卻之至夜復犯正白旗護軍驍騎諸營立營牆禦賊甚力賊不能攻復卻去乘勢突出兵壓賊連破其二營冒矢石踰濠塹以所部先登城賊驚潰或降或竄大兵遂俱入關二年進征西安賊自商

州竄湖廣多鐸奉

命移師江南既至淮安遣率護軍趨揚州列營城北合親軍以紅衣礮攻克之獲戰艦二百餘渡江至江甯追明福王朱由崧於蕪湖敗其舟師晉爵爲子三年從端重親王博洛定浙閩攻克金華衢州破仙霞關下建甯延平明唐王朱聿鍵走汀州偕護軍統領都爾德追擊至城下率驍健先登聿鍵死其總兵姜正希以眾二萬來援令諸將分道擊之斬馘過半明年凱旋晉子爵一等

賜敕予世襲罔替五年授正白旗滿洲都統六年以參贊大

臣偕鄭親王征湖廣是時明總督何騰蛟與總兵王進才馬進忠等據湖南郡邑而遙奉桂王朱由榔軍至長沙與兵部尙書阿哈尼堪率將士先驅拒者輒敗去次湘潭破北門直入敵眾潰奔騰蛟不屈死追潰眾至湘鄉殲之進趨寶慶距城七十里進才進忠迎戰我軍步騎番進且進且戰遂薄城東門進才等潛遁追敗之於沅州靖州進定全州七年班師

賜銀五百兩晉伯爵列議政大臣尋卒

賜祭葬如典禮諡勇敏十二年

詔立碑墓道紀其功子伊理布襲爵

伊理布阿濟格尼堪子祖達音布傳所稱都統議政大臣參贊軍務討逆將軍諡武壯者也崇德三年任兵部理事官順治八年襲父伯爵兼管佐領再遇

恩詔晉爵一等十七年擢刑部侍郎明年遷吏部時鄭成功據臺灣四出劫掠有言瀕海居民宜徙之內地者伊理布奉

命同尚書蘇納海赴江南浙江福建會勘定議還京擢正白旗蒙古都統康熙八年

命赴廣東會同總督盧崇峻勘海疆新移人戶安輯之尋調本旗滿洲都統列議政大臣十二年冬逆藩吳三桂

叛明年

聖祖命順承郡王勒爾錦統師討之伊理布參贊軍務既至荆州三桂據常德陷松滋襄陽總兵楊來嘉副將洪福叛附三桂結山寨穀城鄖陽閒窺諸郡邑奉

詔守宜昌十四年來嘉等犯南漳順承郡王承

制授以討逆將軍印偕副都統根特往援師至賊遁旋犯均州營武當山下督軍進擊陳斬僞副將參將及賊兵千餘賊潰走已而三桂屯松滋北山於沿江集戰艦將合水陸來犯

詔同都統范達禮防守襄陽均州南漳賊將張以誠合來嘉

等復寇南漳率勁旅會總督蔡毓榮夾擊大破之斬
三千餘級獲軍資無算十六年

詔率荊州駐防兵同征南將軍穆占由岳州進長沙恢復茶
陵賊遁攸縣督軍躡之賊憑河岸拒戰我軍奮擊陳
擒百餘人斬四千餘級進復攸縣城明年穆占復郴
州永興等城遂自駐郴州而永興尤賊所必爭伊理
布守之三桂果遣賊將馬寶胡國柱來逼犯我河外
營督軍逆戰不利遂死之喪還

聖祖遣內大臣迎奠又

遣侍衛傳

諭其母曰伊理布時侍朕前深知其人及出師又著勞績方
謂功成凱旋不久相見忽聞陳沒不覺懷愴痛悼茲聞費
用不給

特賜銀六百兩爲治喪資仍

賜祭葬如典禮諡曰武壯於墓道立碑焉子阿什坦襲爵

世宗時詔伊理布入祀昭忠祠蓋自其祖達音布諸父岱袞
至伊理布他塔喇氏三世殉疆場矣而達音布羣從
薩弼圖薩弼圖弟博爾輝族子譚拜譚拜子瑪爾賽
並他塔喇氏以功名著聞於時者各有傳

英俄爾岱初以戎率顯職大司農十數年敏而能斷

其所釐定後，多以爲法而資性和易履貴不驕卒之日諸王大臣弔者傾朝莫不嗟悼時以爲材兼文武有雅量云天命初界藩人犯境逆戰於薩爾滸破之四年從攻明開原有蒙古巴圖魯阿布爾者以驍勇聞降明爲邊將立陳前指麾眾頗憚焉英俄爾岱曰夫何能數盤其馬突縱之斬以歸六年克瀋陽授輕車都尉世職進擊明兵鐵嶺克遼陽晉世職二等天聰三年從

太宗征明克遵化等十一城進攻燕京留共文臣范文程守遵化是年我軍所下石門驛馬蘭峪三屯營大安口

及灤陽等城俱叛明兵夜至遵化攻甚力卒擊卻之平旦敵騎兵列陳以待我師將出戰敵遽縱兵突入我步軍營急麾眾圍而擊之敵退斬其殿後者遂以夜遁躡其後殲騎兵百步卒千餘仍以書諭降諸城五年授戶部承政七年奉

命使朝鮮責其王李倬倬上書謝八年晉世職一等察哈爾林丹汗遁走所屬皆降

太宗命偕副都統布爾吉率師偵之值察哈爾來歸戶口千餘因率其部長上

謁先是道遇察哈爾台吉布顏圖擁餘眾招之降不從誅二

百餘人俘獲甚夥還奏

賜所俘獲至是布顏圖眾三十人來奔稱前者餘眾欲降不之允橫見屠戮僅而以逃匿得生也

太宗怒追奪所賜尋以考滿晉男爵崇德元年八旗及蒙古諸貝勒以

太宗功德日盛宜正位號咸謂朝鮮國王李侗當與斯議白遣英俄爾岱及參政馬福塔尼堪率諸貝勒使者致書朝鮮比至侗不見亦不納所致書陽令國人延居議政府而潛以兵守之於是率諸使者奪民馬乘之突門出走侗遣騎以報書追及而別以書戒其邊臣令固守

因並奪以

聞道遇明皮島兵遮我歸路擊走之二年從

太宗征朝鮮克其國都追圍李侗於南漢城

命與馬福塔齋

敕諭之侗感悟稱臣奉書降復承

旨送侗歸國都既齋

敕册封侗朝鮮國王歸授都統又奉

命往朝鮮義州詰侗罪六年睿親王多爾袞征明圍錦州其

經略洪承疇來援兵甚盛

太宗遣先率師往助旋

親征令營高橋與大軍犄角是年錦州及松山杏山皆下並在軍有功中間連坐額駙佟養性嫁女用十六人爲媵僕知而不阻都統鄂莫克圖爲貝勒豪格脅娶蒙古台吉博洛女嘗與聞承政韓大勳盜取庫物疏於稽查失察家人索借官商財物奉

詔丈量地畝道遇征明錦州軍離城遠駐不之止還朝不以聞副都統布三以隱匿姦人下獄遇

赦令睿親王多爾袞約束爲私請往近邊牧馬處行走諸罪太宗以盡心部務實有可嘉而辦事明決各部大臣多未逮者或贖或免七年往朝鮮鞫獄還奏稱

旨八年考滿晉子爵順治元年從入山海關破流賊李自成定京師改承政爲尙書仍任戶部二年論前後功超授三等公三年請禁民間私售軍械以杜盜源從之四年考滿晉公爵二等五年卒年五十有三故娶饒餘郡王女授多羅額駙筮戶部最久旣授都統仍攝部務卒時睿親王多爾袞攝政聞之夜半馳至其家哭之慟漏盡乃返以故朝臣無不往者子三伊圖襲公爵仕至內大臣

薩弼圖父沙津當

太祖時率眾來歸授佐領累官至都統或曰

太祖嘉其釐定法制

賜號沙金云及卒薩弼圖代管佐領

太宗材之授騎都尉世職兼任參領崇德四年從承政薩木什喀索海征瑚爾哈部師至黑龍江俘健壯百數進攻鐸陳阿沙津二城敵兵四百迎戰偕佐領卓布特以勁卒九十蹕入其陣短兵接斬五十人餘眾潰走索倫部長博穆博果爾以兵來助瑚爾哈部偕副都統伊遜等設伏邀擊斬七十人五年凱旋兼一雲騎尉從圍明錦州刈其城西田禾敵自西北隅出兵以礮遮擊率所部橫衝之敵卻走逐北抵城濠旣營松

山敵步兵掠過以伏大敗之旋守駱駝山城敵石山站兵二百餘來攻分道出擊殲之靡遺六年移兵逼錦州城而營跨濠作橋敵出樵採輒邀斬之翼日城中出兵攜火具將焚橋逆戰卻之旣又步騎大集奪濠門迎斬其前鋒二人麾眾乘之敵遂潰時明經略洪承疇據松山以騎來劫我紅衣礮先眾出擊敗去又破其步兵營三論功晉世職輕車都尉擢本旗滿洲副都統七年隨貝勒阿巴泰征明由界嶺口毀邊牆入擊敗其總兵馬科轉戰至山東以雲梯攻克平度州城順治元年隨睿親王多爾袞入山海關督後

隊擊敗流賊李自成既定燕京偕都統葉臣巴哈納
招撫山西自成黨陳永福據太原以眾出拒六戰皆
敗之下其城移師陝西自成兄子錦據延安進薄其
城七戰七捷會大軍潼關偕前鋒統領錫特庫攻自
成賊寨破之累功並三遇

恩詔晉爵二等男任內大臣以年老致仕卒

賜祭葬如故事子果里襲爵

世祖嘗閱勳簿念薩弼圖功多加

賜一騎都尉俾他子噶布拉襲之弟博爾輝

博爾輝初以護軍校從征董夔有功天聰三年從

太宗征明由龍井關入攻遵化其總兵趙率教自山海關來

援迎斬其副將敵眾驚潰擢護軍參領兼戶部參政

五年從征明甯遠斬其前鋒七人八年從征明大同

敵兵三千自龍門逆戰偕前鋒參領錫特庫佐領星

納等并力擊敗之略地數百里九年使朝鮮還從招

撫察哈爾部自歸化城入略明邊境師旋以二十人

殿敵右衛兵二百有奇突出邀截直前搏戰陳斬十

人獲一人敵遽退而正藍旗軍校格巴庫迫於敵乃

幾及身矣馳援以出論功予騎都尉世職崇德三年

裁參政專任護軍參領順治元年兼刑部理事官從

入山海關擊敗流賊李自成晉二等輕車都尉署護軍統領從順承郡王勒克德渾征湖廣先是自成敗竄其黨馬進忠王進才降俄而復叛聚眾據岳州師至武昌率兵往剿遇賊千餘掠臨湘擊斬略盡直趨岳州進忠進才竄長沙追敗其眾偽副將黑運昌以船二百降凱旋得

優賚授護軍統領列議政大臣論功並遇

恩詔晉二等男爵八年以舉發英親王阿濟格陰謀干政優敘晉爵子初睿親王多爾袞攝政以端重親王博洛敬謹親王尼堪理事專擅降爲郡王比睿親王卒博

爾輝與內大臣羅什並隨在喀喇城及還京以王有遺言欲復兩郡王爲親王告兩黃旗大臣拜音圖譚泰等旣又語兩郡王所屬曰吾曹以睿親王遺言告兩黃旗大臣有日矣而遷延不卽復殆兩黃旗大臣阻之兩郡王以所聞語拜音圖譚泰等於朝曰此爲我輩造釁耳譚泰謂諸大臣曰若非兩王發其姦豈不令兩王銜吾儕而彼得遂其要結之私乎因共白鄭親王濟爾哈朗王具以

聞事下王大臣會鞫以羅什博爾輝誣罔亂政應論死籍沒詔每聞刑人朕輒不忍姑宥其死何如王大臣執奏如初於

是博爾輝羅什並寘於法羅什所喜有冷僧機者姓
納喇氏葉赫之滅歸隸正藍旗天聰初自首與大貝
勒莽古爾泰等逆謀得男爵告兵部參政穆爾泰私
逮繫都統都類令避暑他所得一等侍衛洊入內大
臣晉爵子睿親王多爾袞疾同貝子錫翰等請

世祖臨視坐降爵未幾復之尋晉一等伯睿親王薨以豫親
王多鐸子多爾博嗣奏言昔兩黃旗大臣誓立肅親
王豪格睿親王持之今於多爾博雖破格優遇未足
酬功又言羅什睿親王所厚宜寵異之而羅什亦爲
冷僧機要請

加恩羅什旣得罪

詔詰所指誓立肅親王事詞窮坐死得

旨寬免及內大臣西訥布庫與錫翰等以罪逮訊復得其朋
比奸惡狀亦寘於法

譚拜父阿敦嘗從

太祖征撫順招降明遊擊李永芳累官至都統譚拜初任佐
領天聰五年從圍明大凌河城其總兵祖大壽遣百
餘騎突出來援偕護軍參領布顏圖追斬三十餘人
獲馬二十四六年從征察哈爾部師還與圖理濟伏
俟追兵已而果至起要之多所斬馘八年授騎都尉

世職兼任參領九年從招撫察哈爾部因略地明代
州借前鋒參領蘇爾德安達立以四十人伏忻口值
敵哨卒三百人擊斬過半崇德元年從武英郡王阿
濟格征明敗敵燕京城北又敗之蘆溝橋二年借參
領丹岱薩蘇喀等率護軍驍騎各四十略明邊境次
清河敵兵七百人守之擊潰其眾奪纛二獲馬十數
三年從貝勒岳託征明入牆子嶺薄豐潤縣城扼敵
兵於城濠擊之殲墮無算其內監馮永盛等各以兵
至又擊敗之四年從鄭親王濟爾哈朗以護軍破明
兵錦州城南累功兼一雲騎尉授兵部參政兼任正
白旗蒙古副都統七年從貝勒阿巴泰征明山東三
敗敵兵進攻利津縣克之明年出邊遇明總督趙光
抃范志完總兵吳三桂白廣恩等邀戰以本旗兵進
擊無能禦者凱旋晉輕車都尉

賜金順治元年從入山海關定燕京三年擢兵部尚書隨肅
親王豪格征流賊張獻忠道出陝西借都統馬喇希
等擊敗叛鎮賀珍於雞頭關進兵四川數敗獻忠賊
眾又借都統李國翰渡涪江擊敗賊渠袁韜明年遷
吏部尚書先是論入關定燕京功並以考滿兩晉世
職爲一等及獻忠滅晉爲男爵遇

恩詔晉男爵二等七年卒子瑪爾賽

瑪爾賽既襲父男爵兩遇

恩詔晉男爵一等兼一雲騎尉十五年署副都統隨甯南大將軍宗室羅託征貴州既定貴陽借護軍統領科爾崑擊走白文選取黃平州十六年旋師次荊州聞鄭成功陷鎮江犯江甯借副都統噶褚哈率兵循江下援與駐防將軍哈哈木總督郎廷佐并力擊敗之復追至鎮江成功擁餘眾入海去論功晉一等子康熙元年授本旗滿洲副都統明年同將軍穆里瑪圖海征湖廣流賊李來亨高必正等於茅麓山連戰皆捷

攻賊寨破之來亨自縊死必正率眾降六年擢工部尚書尋調戶部七年兼蒙古都統時淮徐河隄數決總河楊茂勳請於天如閘外築壩逼黃引淮出俾黃淮相敵以歸海給事中李宗孔請塞盱眙決口以防淮流

聖祖命同刑部尚書明珠往江南會勘定議疏言興化縣白駒場舊設四閘洩水由牛灣河入海後因禁海填塞水無所洩淹沒田畝宜卽疏濬仍置板以時啟閉則淹沒無慮而居民亦不必遷移矣清口爲黃淮交匯漕運之要津黃水強則越淮水淮水弱則沙土得入